

Item Pfeffer als ein Faust/vñ Honig auch darunder ein Löffel voll/das wirt sehr bald sawer. Item/wenn das grosse Faß ist voll worden/so geuß das halbe theil in ein ander Faß / das so groß seye/ vnd thue jm in aller maß wie vor/so magstu als viel Essig machen/als viel du wilt / Auch mag er nitteer verderben/wenn du jm also füllest/Wenn er aber ober füllet were / so mag er nit arbeiten / Desgleichen wenn man jm nicht füllet/so verzehret er sich in jm selber/vnd wirt zu nicht. Dis ist eine Kunst/darmit sich einer in einer grossen Statt wol ernehrē mag/wenn einer mag Essig machen/auß faulem vnd seigerm Wein oder Bier/das man sonst auff die Gassen schüttet / das ist hieher alles gut. Auch ist zu wissen/so du nicht magst haben Wein zu füllen oder Bier/so geuß Regenwasser darein vngesotten/aber doch gewärmet/das macht auch Essig/man muß aber nicht zuviel darein giessen des Wassers/als des Weins oder Biers. Hiemit gnug von künstlichem Essig geschrieben.

Ein andere Kunst/wie man guten Essig sol machen.

Item/So preß vnzeitige Weinbeer auß/vnd seihe sie schön/vnd schütt andern Essig darunder/vnd so der drey tag gestchet/ so seihe jm von dem Läger/das thue offte/so hastu guten Essig zu aller zeit.

Wie man Essig auß Bier machen sol.

Item/nimb Bier vnd seuds/vnd wenn es kalt wirt/so leg Sawerteig darein/vnd geröst oder gebrennt Erbsen/so wirt es behend guter Essig.

Item/wirff in die Büten / so es giret / dreisichen Weizenkörner / vnd Rinden von Rocken Brot/vnd ein wenig Mirrha/so wirt auß dem Bier Essig.

Item/nimb vier Maß Wassers/vnd ein quintlin Honig/vnd ein maß Weins / vnd seud es wol/vnd thue es in ein Faßlin/so wirt es bald sawer.

Ein andere Kunst Essig zu machen.

Item/nimb groß Nußbäumenwurzel/vnd thue die in den Wein / so wirdt sehr guter Essig darauß/seud Wein in Kupfferem oder Messinem Geschirr/vñ scheume den Wein ehe das er sich gesehet/so wirt sehr guter Essig daraus.

Item/nimb Gersten/röste sie in einer Pfannen/das sie sehr schwarz wil werden/vnd thue sie in Wein/so hastu in zweyen Tagen guten Essig. Oder nimb eine Crust Rockenbrot / geröst in einer Messinen Pfannen / vnd laß es nicht gar siedent werden / vnd thue denselbigen Wein in einen Krug/so hastu in dreyen oder vier Tagen guten Essig.

Essig zu machen/das jm in einer bey sich mag tragen.

Item/nimb Weinstein / vnd leg den neun oder zehen tag in ein guten Essig / darnach wenn du jm herauf hast gethan/so dörr jm an der Sonnen/vnd wenn er wol dürr ist/so leg ihn wider zehen tag in einen guten Essig/darnach trückne jm aber/vnd stoß ihn gar klein zu Mehl/ vnd thue ein wenig in ein Glas voll Weins / so hastu guten Essig.

Wen man gedörte Merrettichwurzeln puluerisiert/in Essig thut/macht ihn bald scharpff.

Ein andere Kunst guten Essig zu machen.

Item/nimb ein dürres Faß/vnd laß es wol binden vnd bereiten/vnd nimb darnach eine halbe Maß gutes gebranntes Weins/schütt jm in das Faß/vnd schlahe das Faß zu/vnd welcke das gar wol hin vnd her/bis der gebrennte Wein darein gehet/vnd so es vngesährlich ein Tag/zween oder drey an der Sonnen gelegen ist / so schüt alsdenn ein Maß Essigs auch darein / so denn derselbige auch ein Tag oder zween darinnen gewesen ist/alsdenn nimb den abkommenden Essig/ seud ihn in einem Messinen Geschirr/verschäume jm sauber/vnd thue jm desgleichen also warm in das Faß/nimb zu ein sechs Eimerigen Faßlin ein vierding von einem Pfund schwer Bertram/ zerschlage die Wurzel/vnd binds an eine Schnur / vnd hencke es auff das halbe theil ins Faß/vnd bor in den fördern Boden oben ein Loch eines Daumens groß/dasselbige Loch soltu für vnd für offen lassen/ Desgleichen oben in den Spundten/nur mit einem hollen Ziegel verdecken/darmit der Essig lufft habe/vnd laß dich nicht irren / das an den enden/da der Lufft hingehet / viel kleiner Rucklin sizen/ es ist ein Zeichen das der Essig gerecht wirdt / man soll auch allezeit das Faß vmb ein Ahm / oder Wahn lassen.

Guten Essig zu machen.

Item/back sawer Brhab in einem Backofen / vnd lege es in warmen Wein/ vnd vermache den Spunt/so hastu guten essig zu allen dingen.

Essig starck zu machen.

Item/leg oder hencke sawer Brhab in ein bösen oder schwachen Essig/er wirdt starck/ vnd setz jm hinder den Ofen/oder zu der Wärm/wohin du wilt.